

FONDACIJA CURE

VIJESTI

Drugo izdanje April – Juni 2025.

Dragi prijatelji/ce, saradnici/e i podržavatelji/ce,

Zadovoljstvo nam je podijeliti s vama najnovije vijesti o našem radu i zajedničkim uspjesima. Tokom proteklog perioda, od aprila do juna 2025. godine, nastavile smo s aktivnostima usmjerenim na unaprjeđenje položaja žena i ostvarenje društvene ravnopravnosti kroz brojne inicijative, partnerstva i kampanje. Iz ovog perioda posebno ističemo naše članstvo u WAVE mreži, čime smo dodatno osnažile saradnju s regionalnim i evropskim akterima u prevenciji i suzbijanju nasilja nad ženama i djevojčicama.

Iza nas je još jedan period ispunjen predanim radom, solidarnošću i zajedničkim nastojanjima ka pravednijem društvu.

Hvala vam što nas pratite i podržavate – vaša podrška nam daje snagu da ustrajemo na putu društvenih promjena.

Tim Fondacije CURE





PROJEKTI

Implementirane aktivnosti (april – juni 2025.)

Feministička perspektiva brige o sebi i zajednici koja te okružuje

Tokom ovog kvartala realizovane su aktivnosti koje promovišu feminističke pristupe brizi – ne samo o sebi, već i o zajednici koja nas okružuje.

Kroz edukacije, susrete i radionice otvoreni su prostori za osnaživanje žena i djevojaka, dijeljenje iskustava i izgradnju solidarnosti.

Kultura sjećanja i tranziciona pravda

U okviru obilježavanja važnih godišnjica i s ciljem jačanja kulture sjećanja, realizovane su sljedeće aktivnosti:

Otpor zaboravu: žene pamte i traže pravdu Posjeta Ahmićima

Posjetile smo mjesto stradanja Ahmićima – 32 godine nakon zločina u kojem je ubijeno više od stotinu civila. Sjećanjem čuvamo dostojanstvo žrtava i tražimo pravdu. Osuđujemo ratne zločine i pozivamo na odgovornost svih počinilaca. Zajedno dižemo glas protiv rata i nastojimo da se ovakva stradanja više nikada ne ponove.

Edukacije o tranzicionoj pravdi Ženski mirovni kamp u Sarajevu

Održano je predavanje na temu tranzicione pravde iz različitih perspektiva, s fokusom na aktivnosti usmjerene ka izgradnji mira, jačanju socijalne kohezije i izgradnji povjerenja među učesnicama. Ovo je bio prvi Ženski mirovni kamp u okviru projekta „Ženski karavan za pravdu i pomirenje”, u organizaciji Fondacije Lara Bijeljina.



Ahmići, 16. 4. 2025



Sarajevo, 11. 4. 2025.

Ženski sud – deset godina kasnije Regionalni sastanak u Sarajevu

Održan je Regionalni sastanak Ženskog suda – feministički pristup pravdi na kojem smo obilježile dva istorijska događaja: deset godina od organizovanja Ženskog suda – feministički pristup pravdi održanog u Sarajevu (7 – 10. maj 2015.), te dvije godine od Ženskog suda – slučaj Foča (Beograd, 26. 6. 2023.). Neizmerno smo ponosne na odgovoran, hrabar i kreativan doprinos, prijateljstvo, toplinu i podršku svim ženama uključenim u proces rada Ženskog suda.

Međunarodne razmjene i feministička solidarnost Konferencija u Kozarcu

Imale smo čast prisustvovati Međunarodnoj konferenciji „Srcem do mira“, u organizaciji Udruženja „Srcem do mira“. Tokom konferencije razmjenjivane su inspirativne poruke i iskustva žena koje se decenijama bore za pravdu i pomirenje, te se razgovaralo o ulozi žena u procesima izgradnje mira – kako tokom rata, tako i u postkonfliktnim društvima. Imale smo priliku sresti se i s našim dragim kolegicama mirovnjakinjama, podijeliti iskustva i ponovo se podsjetiti koliko je važna zajednička borba za mir.



Sarajevo, 9. – 11. 4. 2025.



Kozarac, 24. 5. 2025.



Kozarac, 24. 5. 2025.

U odbrani sjećanja i istine Bijele trake u Prijedoru

U Prijedoru smo, 31. maja, učestvovali na obilježavanju Dana bijelih traka, u organizaciji tima „Jer me se tiče“, kada se sjećamo 102 ubijene prijedorske djece, kao i mnogobrojnih drugih žrtava. Na ovaj dan 1992. godine vlasti bosanskih Srba naredile su nesrpskom stanovništvu da na svoje kuće okače bijele čaršafe i da na rukavima nose bijele trake – znak za progon, zatvaranje i smrt. Nosimo bijele trake jer odbijamo šutnju. Nosimo ih da bismo rekly: neka se nikome i nigdje ne ponovi. Nosimo ih jer vjerujemo u pravdu, odgovornost i kulturu sjećanja.

Feministička dokumentacija i prenošenje znanja Promocija knjige „Feminističko putovanje kroz vrijeme u BiH“

U saradnji sa Udruženjem žena NERA Konjic, u okviru festivala ŽENERA, održana je promocija knjige „Feminističko putovanje kroz vrijeme“ (<https://fondacijacure.org/wp-content/uploads/2024/12/Publikacija-Feministicko-putovanje.pdf>), koju je izdala Fondacija CURE u okviru istoimenog projekta. Žene su dijelile lične priče o svojoj sposobnosti prevazilaženja izazova i prevenciji retraumatizacije, te ideje kako biti pokretačica promjena u lokalnim zajednicama. Sudjelovalo je 35 žena.



Prijedor, 31. 5. 2025.



Bjelašnica, 1. 6. 2025.





Žene u politici

Projekat Žene u politici, koji su zajednički realizovale Fondacija CURE i Udruženje Budućnost Modriča uz podršku IAMANEH Švicarska i finansijsku podršku Vlade Švicarske, završen je krajem maja 2025. godine. Aktivnosti su se odvijale u Gračanici, Lukavcu, Tuzli, Šamcu, Modriči, Vukosavlju i Doboju, s ciljem osnaživanja političke participacije žena na lokalnom nivou.

Najvažniji rezultat projekta ogleda se u značajnom porastu broja izabranih žena. U poređenju s lokalnim izborima 2020. godine, zastupljenost žena porasla je sa 17% na 24%, a nakon postizbornih imenovanja i zamjena, ukupno je potvrđeno 50 mandata za žene – što čini 26,32% ukupnog učešća u projektnim općinama.

Kroz različite formate aktivnosti – edukativne radionice, forume, postizborne obuke i online kampanju – direktno je uključeno više od 400 osoba. Dodatno, kampanje su dosegle više od 120.000 korisnika/ca, a organizovani su i sastanci sa 14 članica općinskih komisija za ravnopravnost spolova radi planiranja narednih koraka.

Jedan od ključnih događaja u ovom projektu bila je konferencija „Politička moć žena: Izazovi i prilike“, održana od 7. do 9. aprila 2025. godine u Tuzli. Više od 50 učesnica i učesnika iz političkih stranaka, institucija, civilnog sektora i međunarodnih organizacija zajednički je mapiralo

prepreke, predložilo rješenja i uspostavilo nove oblike saradnje.

Tokom World Café radionica definisana su tri pravca djelovanja: izgradnja međusobne podrške među ženama na lokalnom nivou, jačanje saradnje kandidatkinja i političarki s viših nivoa vlasti, te partnerski rad s civilnim sektorom kroz edukacije i zagovaračke aktivnosti.

Poseban fokus bio je na definisanju konkretnih zaključaka i preporuka, među kojima se izdvajaju:

- ekonomsko osnaživanje žena kao temelj političke nezavisnosti,
- uvođenje i primjena afirmativnih mjera i nakon izbora – ne samo kroz kvote već i kroz raspodjelu mandata,
- zakonske izmjene, posebno u oblasti Izbornog zakona i krivičnih zakona vezanih za sajber nasilje,
- ravnoteža u medijskom predstavljanju političarki i suzbijanje stereotipa,
- reforme unutar političkih stranaka, uključujući razvoj mentorskih programa i uvođenje rodni budžeta,
- digitalna sigurnost za žene u javnom prostoru, kao preduslov slobodnog djelovanja,
- jačanje solidarnosti među političarkama na svim nivoima vlasti,
- i uključivanje muškaraca kao saveznika u procese zagovaranja rodne ravnopravnosti.

Memorandum o razumijevanju: Prvi korak ka sistemskoj saradnji

Završnog dana konferencije potpisan je Memorandum o razumijevanju, kojem je prisustvovao Nj. E. Gabriele Derighetti, ambasador Švicarske u BiH. Ovaj dokument simbolizira političku i međusektorsku solidarnost, a usmjeren je na promociju jednakosti, rodne ravnoteže i međusobne podrške žena u političkom životu.

Među ključnim ciljevima memoranduma su:

- uvođenje rodni kvota i u postizbornim fazama,
- automatsko preuzimanje mandata od strane naredne kandidatkinje u slučaju odustajanja,
- unaprjeđenje provođenja Zakona o ravnopravnosti spolova i gender akcionih planova (GAP).

Memorandum predstavlja temelj za sistemsku, dugoročnu saradnju žena iz različitih političkih opcija i sektora.

Digitalne inicijative: Veća vidljivost i znanje

Projekat je dao snažan doprinos digitalnoj vidljivosti političarki i širenju znanja putem online alata. Ključne aktivnosti uključuju:

- Podcast serijal o ženama u politici – pet epizoda dostupnih na YouTube kanalu Fondacije CURE (https://www.youtube.com/playlist?list=P_LNLbZTf1dMJIBnehw8QVO-JlaLjqnghat)
- Interaktivna projektna web stranica: www.wip.fondacijacure.org
- Analiza medijskog izvještavanja o ženama u politici, dostupna na: <https://fondacijacure.org/wp-content/uploads/2025/05/AnalizaZUP-1.pdf>
- Rodna analiza izbornog procesa – Lokalni izbori 2024. godine, dostupna na: <https://wip.fondacijacure.org/objavljena-rodna-analiza-izbornog-procesa-lokalni-izbori-2024/>

Savjetodavna grupa: Dijalog i konkretne preporuke

Tokom maja održana su dva sastanka Savjetodavne grupe – 8. maja u Tuzli i 29. maja u Sarajevu. Grupu čine predstavnici/e političkih stranaka s različitih nivoa vlasti te predstavnik Agencije za ravnopravnost spolova BiH. Sastancima su prisustvovali: Vinka Berjan, Zagorka Grahovac, Zorica Vasiljević, Joško Mandić, Belmin Zukan, Ranko Todorović, Dejan Drinić, Dajana Čolić i Rejhana Dervišević, uz predstavnice partnerskih organizacija Fondacije CURE, Udruženja Budućnost i IAMANEH-a.

Otvoreno se razgovaralo o izazovima u praksi – kao što su:

- neadekvatna podrška kandidatkinjama na listama,
- nejasne procedure povlačenja kandidata/kinja,
- nedostatak transparentnosti kompenzacionih lista i
- potreba za edukacijom žena o izbornim mehanizmima i pravima.

Poseban fokus stavljen je na institucionalnu podršku ženama u osjetljivim životnim situacijama, uključujući porođaj i brakorazvodne postupke, te zaštitu političarki od negativnih i mizoginih kampanja.

Održivost i nastavak djelovanja

Projekat Žene u politici u potpunosti je ispunio svoj osnovni cilj – jačanje političkog učešća žena – i nadmašio je očekivanja. Zahvaljujući snažnoj saradnji partnerskih organizacija i visokoj motiviranosti učesnica, jasno je pokazano da su digitalna pismenost, međusobna podrška i institucionalno prepoznavanje ključni faktori za dugoročne promjene.

Postavljeni su temelji za nastavak aktivnosti koje će dodatno jačati političku vidljivost, zastupljenost i liderstvo žena – s posebnim fokusom na lokalne zajednice, međustranačku saradnju i osnaživanje kroz digitalne alate.



Tuzla, 7. – 9. 4. 2025.



Tuzla, 7. – 9. 4. 2025.



Tuzla, 7. – 9. 4. 2025



Sarajevo, 29. 6. 2025.



Istraživanje fragmentacije feminističkog pokreta u Bosni i Hercegovini

U okviru projekta „Istraživanje fragmentacije ženskog pokreta u Bosni i Hercegovini“, kojeg podržava Fondacije Kvinna till Kvinna, članice tima Fondacije CURE imale su priliku da posvete dragocjeno vrijeme sebi – za unutrašnju refleksiju, preispitivanje vlastitih vrijednosti i ciljeva djelovanja, kao i pozicioniranje u trenutnom društvenom i vremenskom kontekstu. Vrijeme posvećeno brizi o sebi, kako na individualnom tako i na timskom nivou, omogućilo nam je nove uvide u

naš strateški plan djelovanja i dodatno osnažilo naše opredjeljenje za zalaganje za bolji položaj žena i djevojčica u našem društvu. Beskrajno smo zahvalne na podršci naših dugogodišnjih prijateljica iz Fondacije Kvinna till Kvinna iz Švedske, koje nam kontinuirano pružaju razumijevanje, povjerenje i snagu za daljnje djelovanje.

Odgovor zajednice na rodno zasnovano nasilje

Od 26. do 28. maja, u okviru projekta „Odgovor zajednice na rodno zasnovano nasilje“, kojeg finansira EuroCentralAsian Lesbian* Community (EL*C) i Evropska unija, održan je specijalistički trening za grupu pomagačica* u zajednici, koje su osnažene i educirane za pružanje direktne pomoći i podrške članovima/icama LGBTIQ zajednice u Bosni i Hercegovini u procesu pristupa institucionalnom mehanizmu zaduženom za pružanje zaštite žrtvama/preživjelim rodno

zasnovanog nasilja. Oformljena grupa će djelovati po pravilima instituta osoba od povjerenja i prema pravnim odredbama naših zakona o zaštiti od nasilja u porodici. Kroz treninge i materijal u vidu Vodiča za djelovanje, pomagačice* u zajednici su dobile sva potrebna praktična znanja kako pružiti podršku, a čitava ideja se nadovezuje na Mrežu pomagačica koju je razvio i uspostavio Centar ženskih prava, sa tim da su sada u fokusu i zaštita i prava LGBTIQ i nebinarnih osoba.

PARTNERSTVA

Uspjeh prve studentice projekta u Konjicu

U Konjicu smo prisustvovala jednom posebnom trenutku – javnoj odbrani diplomskog rada Larise Kovačević, prve studentice projekta „Obrazovanje obespravljenih djevojaka/žena u BiH“. Larisin uspjeh je uspjeh svih nas! Larisa je dokaz da obrazovanje otvara nove horizonte, a njen rad na temu „Uloga nevladinih organizacija u specijalnim oblicima turizma u Bosni i Hercegovini“ predstavlja značajan korak naprijed.

Obrazovanje je ključ promjena, a svaka prilika za rast je prilika za društvo koje želimo graditi!

Predavanje o prevenciji nasilja

U Centru za interdisciplinarne studije Univerziteta u Sarajevu, polaznicama i polaznicima radionice u okviru EU Peace LL projekta predstavile smo rad Fondacije CURE. U razgovoru sa studentima/cama različitih fakulteta, dotaknute su važne teme poput nasilja među mladima, s posebnim fokusom na rodno zasnovano nasilje i nasilje u online svijetu. Studenti/ce su na ovom susretu imali/e priliku pitati i razgovarati o temama poput zloupotrebe autoriteta, uloge institucija u prevenciji nasilja, uticaju medija i društvenih mreža, te važnosti i odgovornosti posmatrača i posmatračica u situacijama nasilja. Razgovor je protekao u opuštenoj atmosferi, kao zajednički brainstorming i diskusija, koja će poslužiti kao podloga za izradu priručnika na kojem polaznice i polaznici nastavljaju rad sa profesoricama.

„Zašto geoparkovi u BiH i zašto obespravljene žene“

U Sarajevu smo početkom mjeseca juna učestvovala okruglom stolu na temu „Zašto geoparkovi u BiH i zašto obespravljene žene“. Prisustvovala smo predavljanju Inicijative za osnivanje geoparka u Bosni i Hercegovini. Nakon deset godina rada i zalaganja, ideja je konačno zaživjela, a pokretanje ove inicijative pokazuje da se snovi mogu ostvariti – posebno kada se u njih uključe i obespravljene žene.



Sarajevo, 13. 5. 2025.



Sarajevo, 3. 6. 2005.



Konjic, 29. 4. 2025.

ONLINE KAMPANJE

Kampanja za besplatno posredovanje u Federaciji BiH

Tokom maja i juna bile smo partnerice Centru ženskih prava iz Zenice u javnoj kampanji o preprekama i problemima sa kojima se susreću žene koje prolaze kroz proces posredovanja prilikom razvoda braka u Federaciji BiH, te smo promovirale potpisivanje Peticije za besplatno i dostupno posredovanje u Federaciji BiH koja se još uvijek može potpisati na linku: https://bit.ly/Peticija_Posredovanje.

Budući da nasilje nije prepoznato kao razlog za izostavljanje procesa posredovanja, tražimo hitne izmjene Porodičnog zakona FBiH, ukidanje naplate posredovanja u svim kantonima FBiH, uvođenje obavezne dostupnosti usluge u svakoj općini, te osiguranje jednakog prava na sigurnost za sve osobe.

Njeno ime zaslužuje ulicu

Pokrenule smo kampanju „Njeno ime zaslužuje ulicu“ u saradnji sa Fondacijom LARA. Kroz šest kratkih videa, profesori, novinari i influenceri predstavili su po jednu bosanskohercegovačku ženu čije je ime već vezano za sarajevske ulice ili koja zaslužuje da bude prepoznata. U videima su prikazane žene koje imaju ulice ili murale, one koje su ih nekada imale, kao i one koje Sarajevo još uvijek nije dovoljno vrednovalo.

Kampanjom podsjećamo na važnost njihove uloge u historiji i podstičemo širu društvenu memoriju. Žene su umjetnice, naučnice, aktivistkinje i graditeljke mira. Njihova perspektiva je ključna za pravednije društvo, a nazivi ulica i spomenici su način da ih trajno sačuvamo.

Pozivamo vas da pogledate ove video priče na instagramu @fondacijacure i zajedno s nama istražujete bogatu žensku historiju Bosne i Hercegovine.



Sarajevo, 11. 5. 2025.

ANGAŽMAN FONDACIJE CURE KROZ JAVNE DOGAĐAJE I SARADNJE

U periodu od aprila do juna 2025. godine, predstavnice Fondacije CURE aktivno su učestvovala u brojnim događajima, konferencijama, edukacijama i umjetničkim inicijativama – kako na međunarodnom, tako i na lokalnom i regionalnom nivou. Kroz ove aktivnosti ojačana je saradnja sa različitim partnerima,

promovirane su feminističke vrijednosti, osnaživane su žene i djevojke, te doprinosilo vidljivosti ključnih tema u oblasti ljudskih prava, rodne ravnopravnosti i društvene pravde. U nastavku izdvajamo najznačajnije angažmane, podijeljene prema tematskim cjelinama

MEĐUNARODNE KONFERENCIJE I DOGAĐAJI

Mreža Žena u crnom – Beograd/Radmilovac

Regionalni sastanak Mreže Žena u crnom održan je od 4. do 6. aprila 2025. godine u Radmilovcu kod Beograda, uz učešće 68 osoba iz različitih dijelova Bosne i Hercegovine (Tuzla, Sarajevo, Zvornik), Crne Gore (Kotor, Pljevlja), Hrvatske (Zagreb), Kosova (Gjakova/Đakovica), Izraela (Haifa), Palestine (Betlehem), Poljske (Krakov), Slovenije (Ljubljana) i Srbije (uključujući Priboj na Limu, Beograd, Kruševac, Zrenjanin, Novi Sad, Sombor, Leskovac, Bajinu Baštu, Novi Pazar, Kraljevo, Pančevo i Vlasotince).

Sastanak je započet minutom šutnje u znak sjećanja na sve osobe koje više nisu s nama – žrtve ratova, izbjeglice i stradale u prirodnim

katastrofama, uključujući Ukrajinu, Gazu, Izrael, Avganistan, Siriju, Jemen, Palestinu, Sudan, Kongo, Libiju, Tigraj, Mjanmar, Pakistan, Iran i žrtve nesreće u Novom Sadu 1. novembra 2024. godine.

U okviru sastanka raspravljalo se o tranzicionoj pravdi iz feminističke perspektive, genezi i evoluciji ratova, svjedočenjima s terena iz ratnih zona, kao i o studentskim buntovima, blokadama i marševima. Razmjena iskustava i stavova doprinijela je osnaživanju regionalne feminističke solidarnosti i zajedničkom razumijevanju aktuelnih društveno-političkih izazova.



Beograd/Radmilovac, 4. – 6. 4. 2025

EL*C konferencija u Rimu

U periodu od 23. do 26. aprila 2025. godine, u Rimu je održana Četvrta konferencija EuroCentralAsian Lesbian* Community (EL*C), koja je okupila više od 750 učesnica iz Evrope i Centralne Azije. Među njima su bile i članice Fondacije CURE. Konferencija je pružila siguran prostor za razmjenu iskustava, osnaživanje i političko organizovanje lezbejki i LBTQIA+ osoba. Kroz panele, radionice i diskusije, učesnice su govorile o interseksionalnosti, medijskoj reprezentaciji, ekonomskim izazovima, mentalnom zdravlju, nasilju u vezama i uslovima života lezbejki u različitim kontekstima.

Ljubljana Pride

Učestvovala smo na međunarodnom seminaru u sklopu Ljubljana Pride festivala, gdje smo s aktivistkinjama iz cijelog svijeta razmjenjivale znanja o ljudskim pravima, LGBTIQ+ pitanjima i otporu ugnjetavanju. Kroz radionice, filmske projekcije i diskusije, povezale smo feminističke, antiratne i queer perspektive. Seminar smo završile učestvujući u Povorci ponosa sa jasnom porukom: „No Pride in Genocide“.

Prijem kod britanskog ambasadora – Sarajevo

Prisustvovala proslavi rođendana Kralja Čarlsa III. Susrele smo se sa brojnim prijateljima/cama i kolegama/cama iz svijeta politike, biznisa, kulture, sigurnosti, cyber sigurnosti, odbrane i nevladinog sektora.



Rim, 26. 4. 2025.



Ljubljana, 15. 6. 2025.



Sarajevo, 12. 6. 2025.

LOKALNE I REGIONALNE INICIJATIVE

Konferencija „Ujedinjene za mir i sigurnost – Bosanska Krupa

U Bosanskoj Krupi je u periodu od 16. do 18. maja održana konferencija „Ujedinjene za mir i sigurnost“, koja je okupila 310 učesnica iz Bosne i Hercegovine i dijaspore. Tokom susreta dijeljene su priče, snovi, suze i osmijesi, čime su građeni mostovi međusobnog razumijevanja, povjerenja i solidarnosti. Potpisan je Memorandum o zajedničkom djelovanju u okviru UN Rezolucije 1325, koji su potpisala čak 62 udruženja.

Meridiano D'Europa – Sarajevo

Fondacija CURE je sa ponosom učestvovala u projektu Meridiano D'Europa, nevjerovatnom edukativnom programu koji je okupio više od 250 srednjoškolaca/ki iz Italije koji su došli/e u posjet Srebrenici i Sarajevu.

Ovaj program pružio je mladim ljudima priliku da postanu aktivni sudionici u oblikovanju evropske budućnosti, inspirirajući ih da kroz dijalog razvijaju alate za suočavanje sa izazovima koji ugrožavaju naše demokratske vrijednosti i ljudska prava.

„Ramizovo ljeto“ – dokumentarni film

U Meeting pointu u Sarajevu prisustovale smo premijeri dokumentarnog filma „Ramizovo ljeto“, autora Dejana Kožula. Film donosi snažnu priču o aktivizmu, ljudskoj posvećenosti i neiscrpoj borbi za dostojanstvo. Kroz lik Ramiza, publika je imala priliku upoznati svakodnevicu jednog tihog heroja čija je životna misija bila pomoći drugima i ostati vjeran principima solidarnosti. „Ramizovo ljeto“ je svjedočanstvo vremena i ljudi koji nisu odustajali čak ni kada je bilo najteže.

GenZ FEST – Sarajevo

Fondacija CURE učestvovala je na prvom izdanju GenZ FEST-a, dvodnevno dogaćaja održanog 23. i 24. maja 2025. godine u Sarajevu, posvećenog mladima, inovacijama i obrazovanju.

Festival je okupio srednjoškolce/ke, studente/ice i mlade profesionalce/ke, pružajući im priliku za umrežavanje, razmjenu ideja i inspiraciju kroz niz predavanja, radionica i interaktivnih sesija.

Predstavnice Fondacije CURE su u okviru World Café sesije predstavile aktivnosti i vrijednosti organizacije, a tokom dana su kroz neformalne razgovore s posjetiteljima/cama – prvenstveno mladima – razgovarale o važnosti feminizma, građanskog aktivizma i ravnopravnosti.





Bosanska Krupa, 16. – 18. 5. 2025.



Bosanska Krupa, 16. – 18. 5. 2025.



Sarajevo, 9. 6. 2025.



Sarajevo, 10. 5. 2025.

AKTIVIZAM, KULTURA I UMJETNOST

Kvirhana 2025.

Prisustovale smo otvaranju Kvirhane 2025. u Pozorištu mladih Tuzla, na sceni Kaleidoskop u organizaciji Tuzlanskog otvorenog centra (TOC). Ovogodišnje izdanje festivala stavlja fokus na etikete – one koje nam se nameću odbacujemo, a biramo one koje simbolizuju ljubav, zajedništvo i podršku. Pod parolom „Budite dio oslobađajućeg pokreta i društva koje napušta svoje ograničavajuće kalupe“, Kvirhana nas poziva da zajedno istražimo značenja etiketa, gradimo nova prijateljstva i otvaramo prostor za slobodno izražavanje identiteta.

A kroz sve to, ne zaboravimo – ljubav nema etiketu!

PitchWise na Kvirhani – Sarajevo

Sudjelovale smo na festivalu Kvirhana koji se ove godine održao pod snažnim sloganom „Nismo ti mi od jučer“, kojim se jasno i glasno afirmira postojanje, otpor i doprinos LGBTIQ osoba kroz historiju. Na panelu „Kulturni značaj feminističkih i kvir festivala“ predstavile smo PitchWise festival ženske umjetnosti i aktivizma, naglašavajući njegovu važnost za povezivanje umjetnosti, politike i borbe za ljudska prava.



Bh. povorka ponosa – Sarajevo

Održana je šesta Bh. povorka ponosa, pod sloganom „Ljubav je zakon”, praćena zvižducima, aplauzima i porukama poput “Ljubav je zakon” i “Ovo je protest”. Pored zastava duginih boja, učesnici/e nosili su i transparente podrške narodu Palestine, među kojima se izdvajao natpis „Free Palestine”, dok su se čuli i uzvici „Sloboda za Gazu”. Učesnici/e su poručili da je „Sarajevo slobodan grad” i da „ponovo pripada Evropi”, ali i da pravni okvir u Bosni i Hercegovini i dalje ne priznaje prava LGBTIQ+ zajednice – posebno kada je riječ o mogućnosti sklapanja braka i usvajanja djece u istospolnim zajednicama.



Sarajevo, 14. 6. 2025.

Festival „Savremena žena“ – Tuzla

Festival „Savremena žena“ okupio je izuzetne žene iz cijelog svijeta, promovirajući liderstvo, inovacije i društvenu odgovornost. Ovaj događaj razvio je platformu za razmjenu znanja, umrežavanje i inspiraciju, gdje su učesnice iz različitih sfera društva dijelile svoje priče i vizije.

Članica Fondacije CURE podijelila je svoje iskustvo sa učesnicama kroz panel-diskusiju. Festival je realizovan u okviru Evropskog dijaloga u BiH „30 godina mira & kako dalje?“, u sklopu sesije: „Monitoring – Znamo li sva naša prava?“



Tuzla, 19. – 22. 6. 2025



Sarajevo, 14. 6. 2025.



Tuzla, 19. – 22. 6. 2025

PROMOCIJA ZNANJA I KNJIŽEVNOSTI

Promocija knjige „Ptice koje odlaze i vraćaju se u kavez života“ – Sarajevo

U Muzeju književnosti i pozorišne umjetnosti Bosne i Hercegovine održana je promocija knjige „Ptice koje odlaze i vraćaju se u kavez života“ autorica Melihe Sendić i Duške Andrić, dugogodišnjih aktivistkinja i borkinja za prava žena iz Centra ženskih prava iz Zenice. Knjiga je rezultat više od 20 godina rada u oblasti ljudskih

prava i rodne ravnopravnosti, a kroz nju autorice udružuju svoje glasove u pozivu ženama da žive slobodno. Na promociji su, pored autorica, učestvovala i Jadranka Miličević te Jasmina Čaušević iz Fondacije CURE, koja je moderirala razgovor.

IZDVAJAMO

Članstvo u WAVE mreži

Fondacija CURE je u maju ove godine postala dio WAVE mreže – mreže ženskih organizacija iz cijele Evrope koje se zalažu za zaštitu žena i djece od nasilja (WOMEN AGAINST VIOLENCE EUROPE – Feminist Network Promoting Human Rights of Women and Children). WAVE je mreža od više od 180 evropskih ženskih nevladinih organizacija koje se bave prevencijom i zaštitom žena i djece od nasilja. Fondacija CURE sa WAVE mrežom dijeli zajedničke vrijednosti i vjerujemo

da će ovo članstvo biti prilika za ostvarivanje zajedničkih ciljeva i vizije. Mreža WAVE je podrška ženama u više od 46 zemlja u kojima nastoji identificirati nedostatke i prepreke u implementaciji Istanbulske konvencije. Radujemo se zajedničkom rastu i saradnji te istrajnom zalaganju za život bez nasilja za sve žene i djecu.



HVALA DONATORKAMA I DONATORIMA!

Kvinna till Kvinna (KTK), Global Fund for Women (GFW), Fondacija TRAG / Fondacija OAK, Heart and Hand Fund, Sigrid Rausing Trust, Heinrich Böll Stiftung Sarajevo (HBS), Friedrich-Ebert-Stiftung u Bosni i Hercegovini (FES), Women's World Day of Prayer (WWDP) – German Committee, Vlada Švicarske, IAMANEH Švicarska, EuroCentralAsian Lesbian* Community (EL*C) i Evropska unija

Fondacija CURE želi da se zahvali svima vama – prijateljicama i prijateljima iz Bosne i Hercegovine i cijeloga svijeta – na vašoj kontinuiranoj pažnji, podršci i prijateljstvu koje nam bezrezervno pružate. Vaša solidarnost nas motiviše, ohrabruje i osnažuje da istrajemo u borbi za ravnopravnost, pravедnost i slobodu.

Zajedno gradimo društvo u kojem je feministički glas snažan, prisutan i nezaobilazan.

Hvala što ste uz nas.

Tim Fondacije CURE:
Jadranka, Stela, Denija, Selma, Enida, Lana, Sanda, Jasmina i Lejla



**Uključi se u radionicu.
Dođi na marš.
Podijeli ovu priču.
Podrži rad Fondacije CURE.**

**Tvoje prisustvo, tvoja riječ, tvoja podrška
– znače promjenu.**

PRATITE NAS I PRIKLJUČITE NAM SE!

 +387 33 207 561

 info@fondacijacure.org

 fondacijacure.org

 [fondacijacure](https://www.facebook.com/fondacijacure)

 [@fondacijacure](https://www.instagram.com/fondacijacure)

 [@Fondacija_Cure](https://twitter.com/Fondacija_Cure)

 [Fondacija CURE](https://www.youtube.com/Fondacija_CURE)